

**KANTONALNA
PRIVREDNA
KOMORA TUZLA**

**BROJ 1-3/26,
januar – mart
2026. godine**



KOMORSKI INFORMATOR



**„MORAMO BITI REALNI
– 2026. GODINA BIĆE
IZAZOVNA“**



**KVALITET PRAKTIČNE
NASTAVE U FOKUSU**



**PREDSTAVLJEN JAVNI
POZIV VRIJEDAN 28
MILIONA KM**



**“PRIVREDA TK” NA SAJMU
TURIZMA U BEOGRADU**

Komorski informator

Uvod

Poštovani čitaoci!



U 2026. godinu se zakoračilo sa porukom da će biti izazovnija od prethodne. Rečeno je to na godišnjem druženju sa predstavnicima sredstava informisanja koje se u Komori organizuje na kraju svake godine. "2025. godina nije bila laka i 2026. će biti zahtjevna", poručio je Nedret Kikanović predsjednik Kantonalne privredna komora Tuzla.

I odmah se pristupilo zahtjevnim poslovima, projektima, redovnim aktivnostima. predstavljeni su rezultati Studije praćenja kvaliteta realizacije praktične nastave koja se po prvi put realizovala u Tuzlanskom kantonu kroz projekat „Unapređenje i promocija dualno organozovanog srednjeg stručnog obrazovanja“ kojeg Komora provodi uz podršku vlade SR Njemačke (BMZ) i Švicarske vlade kroz Inicijativu „Jačanje srednjeg stručnog obrazovanja i obuke u BiH“.

Organizovan je u Komori Info dan, na kojem je potencijalnim aplikantima prezentovan javni konkurs za odabir korisnika grant sredstava tekućih i kapitalnih transfera za 2026. godinu a kojeg je objavilo Federalno ministarstvo razvoja, poduzetništva i obrta.

Sezona sajamskih aktivnosti za 2026. godinu je otvorena nastupom na Sajmu turizma u Beogradu. Ne treba posebno pominjati da je to postal tradicija a das u u planu još niz aktivnosti na značajnim sajamskim manifestacijama u zemlji i region. I trend je povećanja broja nastupa i promocije Privrede TK.

Komora je bila domaćin jednodnevnom seminaru na temu: "Poslovna žena-Lična efektivnost i emocionalna inteligencija" (Business woman-Personal effectiveness andemotional intelligence).

Predstavnici Komore su bili sastavni dio delegacije Grada Tuzle koja je upriličila posjetu Agenciji za sigurnost hrane Bosne i Hercegovine. Dogovoreno je održavanje „Seminara o deklarisanju hrane“.

Bilježimo u prvom kvartalu održavanje 2. foruma poljoprivrednika Tuzlanskog kantona, promociju monografije „Zaštićena šumska područja u Tuzlanskom kantonu“ autora Refika Hodžića, niz informacija iz MAT-a, Vlade Tuzlanskog kantona, firmi članica, Grada Tuzla...

Nažalost, ovaj broj lista "Komorski informator" donosi i informacije vezane za gašenje jednog od najvećih bh privrednih giganata, lukavačke "Koksare" Prenosimo Odluku koju je donijela Skupština povjerilaca Koksare u stečaju te nastojanja Vlade Tuzlanskog kantona da učini sve što je u okvirima njene moći i nadležnosti kako bi pomogla u procesu socijalnog zbrinjavanja radnika „Koksare“.

Dino Kalesić
gl. i odg. urednik



Komorski informator

Sadržaj

**KANTONALNA
PRIVREDNA
KOMORA TUZLA**

**KOMORSKI INFORMATOR
BROJ 1-3/26,**
januar – mart
2026. godine

IZDAVAČKI SAVJET:

Nedret Kikanović
Almir Mešić
Edina Kurtić
Suad Selimović

REDAKCIJSKI KOLEGIJ:

Nedret Kikanović
Almir Mešić
Edina Kurtić
Suad Selimović

IZDAVAČ:

Kantonalna privredna
komora Tuzla

GL. I ODGOVORNI UREDNIK:

Dino Kalesić

TEHNIČKA PRIPREMA, REPRO I ŠTAMPA:

GRIN d.o.o. Gračanica

ZA ŠTAMPARIJU:

Mirnes Salihović, direktor

TIRAŽ:

500 primjeraka.

ADRESA:

Trg slobode bb
e-mail: kpktz.ba@bih.net.ba
<http://www.kpktz.ba>

	„Moramo biti realni – 2026. godina biće izazovna“	4
	Kvalitet praktične nastave u fokusu	5
	„Seminar o deklarisanju hrane“	6
	Posjeta predstavnika PK Poljske	7
	Predstavljen Javni poziv vrijedan 28 miliona KM	8
	“Poslovna žena-Lična efikasnost i Emocionalna inteligencija”	9
	Uskoro prezentacija rješenja u oblasti cyber sigurnosti	10
	“Privreda TK” na sajmu turizma u Beogradu	11
	„Odluka o gašenju proizvodnje je konačna“	12
	Vlada TK će učiniti sve da tranziciju za radnike Koksare učini što bezbolnijom	13
	„Trendovi koji oblikuju budućnost agrobiznisa“	14
	„Zaštićena šumska područja u Tuzlanskom kantonu“	15
	Unaprjeđenje turističke ponude TK	16
	Jasnija pravila i snažniji razvoj turizma u TK	17
	Najava sajamskih manifestacija u BiH	18-19
	Najava sajamskih manifestacija u regionu	20
	Aviolinije za sedam novih destinacija	21



Redovna godišnja konferencija za medije...

“Moramo biti realni – 2026. godina biće izazovna”

Nakon teške 2025. privredu TK čeka još jedna zahtjevna godina



U Kantonalnoj privrednoj komori Tuzla održano je tradicionalno godišnje druženje sa predstavnicima sredstava informisanja. Kako je istaknuto, 2025. godina nije bila laka i 2026. će biti zahtjevna. Govorilo se padu potražnje na tržištu Evropske unije što je u dobroj mjeri obilježilo 2025. godinu za privredu Tuzlanskog kantona, o TK kao izvozno orijentiranoj regiji koja je značajno osjetila posljedice usporavanja evropske ekonomije kroz smanjenje proizvodnje i izvoza. Odati su i priznanje domaćim privrednicima koji su uspjeli zadržati stabilnost i konkurentnost zahvaljujući kvalitetu proizvoda i prilagođavanju tržišnim uslovima. Predstavnicima sredstava informisanje obratio se analizom Nedret Kikanović predsjednik Kantonalne privredne komore Tuzla.

“Godina koju ispraćamo bila je izazovna za privredu Tuzlanskog kantona. Slabljenje potražnje na evropskim tržištima, rast troškova poslovanja i izražen nedostatak radne snage snažno su pogodili našu privredu. U prvih devet mjeseci zabilježen je pad industrijske proizvodnje od oko 7 posto, kao i pad izvoza i uvoza od približno 6 posto. To su jasni signali da je privreda pod snažnim pritiskom i da su potrebne brze, odlučne i koordinisane mjere. Tržište rada dodatno potvrđuje složenost situacije. Prosječna plata, iako je porasla, i dalje zaostaje za federalnim prosjekom. To govori da ekonomski rast nije dovoljan da zadrži radnu snagu i osigura dugoročnu stabilnost. Moramo biti realni – 2026. godina biće izazovna. Posebno izazovan period očekuje kompanije koje se suočavaju s obavezama zelene tranzicije, dekarbonizacije i primjene evropskih standarda održivog poslovanja. Bez systemske podrške i razumijevanja realnih mogućnosti privrede, ti procesi mogu postati ozbiljan teret. Ipak, postoje i važne prilike.

Reformska agenda može biti snažan pokretač promjena ako se bude provodila u partnerstvu s privredom. Naš cilj mora biti stvaranje stabilnog, predvidivog i konkurentnog poslovnog ambijenta – ambijenta u kojem se isplati ulagati, raditi i ostajati. Privredna komora Tuzlanskog kantona će i u narednoj godini aktivno raditi na jačanju domaće privrede, pripremamo promociju privrede Grada Tuzle u Češkoj Republici, kao i nastavak razvoja dualnog srednjeg stručnog obrazovanja, kako bismo obezbijedili kadar koji domaćoj privredi nedostaje. Na kraju, poruka je jasna: pred nama su izazovi, ali i šanse. Samo zajedničkim radom institucija, privrede i obrazovnog sistema možemo osigurati stabilniji i održiviji razvoj.



Želim vam prije svega dobro zdravlje, ličnu sigurnost i poslovni uspjeh u godini koja dolazi”, zaključio je predsjednik Kikanović.

D.K.



“Unaprjeđenje i promocija dualno organozovanog srednjeg stručnog obrazovanja”...

Kvalitet praktične nastave u fokusu

Predstavljena Studija praćenja kvalitete realizacije praktične nastave u Tuzlanskom kantonu



U Kantonalnoj privrednoj komori Tuzla, predstavljeni su rezultati Studije praćenja kvaliteta realizacije praktične nastave koja se po prvi put realizovala u Tuzlanskom kantonu kroz projekat „Unaprjeđenje i promocija dualno organozovanog srednjeg stručnog obrazovanja“ kojeg Komora provodi uz podršku vlade SR Njemačke (BMZ) i Švicarske vlade kroz Inicijativu „Jačanje srednjeg stručnog obrazovanja i obuke u BiH“.

Studija je imala za cilj sagledati trenutno stanje u realizaciji praktične nastave, identificirati ključne izazove i dati preporuke za daljnje unaprjeđenje. Osim toga, studija će poslužiti kao polazna osnova za naredne godine, kako bi se pratio napredak i kvalitet praktične nastave koja učenicima obezbjeđuje znanja i vještine potrebne za buduće uključivanje na tržište rada.



“Prvi put na području Tuzlanskog kantona imamo Studiju praćenja realizacije praktične nastave u srednjem stručnom obrazovanju. Potrebna nam je kako bi dobili osnovu i smjernice, kako dalje raditi u srednjem stručnom obrazovanju, kada govorimo o praktičnoj nastavi. Ovo je veliki projekat realizovan zahvaljujući našim partnerima”, rekao je Nedret Kikanović predsjednik Kantonalne privredne komore Tuzla. Kako je istaknuto na skupu u Komori, period pred nama donosi jasnu sliku i u narednom periodu će se vidjeti kvalitet

svih segmenata ovog projekta. **“Mislim da je ovo početak procesa. Sigurno je da će ovakva struktura organizacije praktične nastave u privrednim subjektima polučiti dobre rezultate. Ono što je jako bitne jeste da po prvi puta ovu problematiku pokušavamo riješiti sistemski”,** zadovoljan je cjelokupnim procesom Zlatko Ibršimović, savjetnik za srednje obrazovanje u Pedagoškom zavodu Tuzlanskog kantona.

“Obuhvatili smo 112 učenika praktične nastave unutar privrednih subjekata. Na osnovu niz aktivnosti utvrdili smo da su privrednici izuzetno zadovoljni realizacijom praktične nastave te da, uz određene sugestije, postoje mogućnosti za napredovanje. Iz tog razloga su okupljeni eksperti iz tih oblasti, ljudi koji direktno rade na tim procesima kako bi zajedničkim snagama unaprijedili taj proces i Tuzlanski kanton što više približili modernim trendovima, dakle, razvitku dualnog obrazovanja”, izjavio je Nikola Čiča, autor predstavljene Studije. Osim predstavnika obrazovnih institucija, učešće su uzeli i predstavnici škola i kompanija. Posebno značajno je bilo prisustvo koordinatora i mentora praktične nastave u školama i poslovnim subjektima, koji direktno učestvuju u realizaciji praktične nastave i imaju ključnu ulogu za njen kvalitet. To je bila prilika da se upoznaju sa rezultatima studije, ali i da podijele svoja iskustva sa realizacijom praktične nastave i zajedno identificiraju izazove i buduće pravce djelovanja u cilju kvalitetnije realizacije praktične nastave. Anketa koju je Komora provodila prethodnih godina, pokazale su potrebu da se saradnja kompanija i skola poboljša i unaprijedi pa je ovakva vrsta događaja idealna prilika za upoznavanje, povezivanje i uspostavljanje kvalitetnije saradnje dva mjesta učenja. Projekat se realizuje u okviru programa „Održivi ekonomski razvoj i promocija zapošljavanja“ (SEDEP) u BiH, kojeg u dijelu „Jačanje srednjeg stručnog obrazovanja i obuke u BiH“ sufinansiraju Vlada SR Njemačke (BMZ) i Vlada Švicarske, a implementira GIZ.

Pripremila: Edina Kurtić, rukovodilac
Sektora udruženja



Sastanak u Agenciji za sigurnost hrane BiH...

“Seminar o deklarisanju hrane”

Agencija, Grad Tuzla i Kantonalna privredna komora TK pripremaju
“Seminar o deklarisanju hrane”



Agencija za sigurnost hrane Bosne i Hercegovine u saradnji sa Gradom Tuzla i Kantonalnom privrednom komorom Tuzla priprema „Seminar o deklarisanju hrane“ na koji će biti pozvani subjekti u poslovanju s hranom iz cijele Bosne i Hercegovine. Tim povodom u radnoj posjeti Agenciji za sigurnost hrane Bosne i Hercegovine je boravila delegacija iz Tuzle predvođena dr. sci. Zijadom Lugavićem gradonačelnikom Tuzle u čijoj su pratnji bili prof. dr. sci. Jasmin Ferizbegović predsjednik Veterinarske komore Federacije BiH i Nedret Kikanović predsjednik Kantonalne privredne komore Tuzla sa saradnicima. Na sastanku su usaglašeni tehnički i organizacijski detalji seminara koji će biti održan 31. marta 2026. godine u Tuzli. Direktor Agencije za sigurnost hrane Bosne i Hercegovine dr. sci. Sanin Tanković istaknuo je da je Agencija opredijeljena za saradnju s lokalnim zajednicama u Bosni i Hercegovini, te u tom smislu i planira provođenje svojih aktivnosti u svim krajevima naše zemlje. Zahvalivši gradonačelniku Lugaviću i članovima delegacije iz Tuzle što su Agenciju prepoznali kao kredibilnog partnera, upoznao je goste s ključnim izazovima s kojima se naša institucija suočava u svakodnevnom radu.

Kroz prezentaciju koju je održao Dragan Tomović, šef Odsjeka za procjenu rizika i naučne podatke u Agenciji za sigurnost hrane Bosne i Hercegovine, gostima su predstavljene nadležnosti i rad Agencije. Gradonačelnik Lugavić izrazio je zadovoljstvo saradnjom s Agencijom za sigurnost hrane Bosne i Hercegovine te ocijenio da je jačanje kapaciteta subjekata u poslovanju s hranom za implementaciju propisa o hrani izuzetno značajno za građane i privredu Bosne i Hercegovine. Deklarisanje ili označavanje hrane je jedna od najsloženijih pravno uređenih oblasti vezanih za hranu, a ujedno predstavlja najvažniji moment u komunikaciji subjekta u poslovanju s hranom i potrošača. S obzirom na izuzetno veliko zanimanje subjekata u poslovanju s hranom, koji kontinuirano traže podršku Agencije u tumačenju i pravilnoj primjeni odredbi Pravilnika o pružanju informacija potrošačima o hrani, namjera organizatora je da se na ovom seminaru razjasne nedoumice s kojima se privatni sektor suočava u svakodnevnom radu.



Planirano je da se, kroz prezentacije predstavnika Agencije i panel diskusije u kojima će učestvovati stručnjaci, predstavnici privatnog sektora i strukovnih udruženja, razmijene mišljenja i iskustva u primjeni Pravilnika o pružanju informacija potrošačima o hrani, kao i drugih propisa koji se primjenjuju na specifične kategorije prehrambenih proizvoda.

Grad Tuzla



Iz Gradske uprave Tuzla...

Posjeta predstavnika PK Poljske

Gradonačelnik Lugavić razgovarao s predstavnikom Privredne komore Republike Poljske



Gradonačelnik dr. sc. Zijad Lugavić održao je sastanak s predstavnikom Privredne komore Republike Poljske i vlasnikom kompanije „Rifamm“ d.o.o. Lukavac, Borisom Milićem. Tokom razgovora razmijenjene su ideje o poslovanju i razvojnim planovima kompanije, kao i o mogućnostima unapređenja saradnje i jačanja privrednih aktivnosti na području Tuzle. Istaknuta je važnost povezivanja domaćih privrednika sa međunarodnim partnerima, s ciljem otvaranja novih tržišta i investicionih prilika. Grad Tuzla nastavlja njegovati partnerski odnos s privrednim subjektima, pružajući podršku inicijativama koje doprinose ekonomskom razvoju i jačanju lokalne privrede.

Unaprjeđenje sigurnosti hrane

Gradonačelnik Lugavić održao sastanak s direktorima Agencije za sigurnost hrane BiH i Veterinarske stanice Tuzla



U Gradskoj upravi Tuzla je gradonačelnik dr. sc. Zijad Lugavić održao sastanak sa direktorom Agencije za sigurnost hrane Bosne i Hercegovine, dr. sc. Saninom Tankovićem i direktorom JP Gradska veterinarska stanica Tuzla, prof. dr. sc. Jasminom Ferizbegovićem, o pitanjima unapređenja sigurnosti hrane i jačanja institucionalne saradnje u ovoj oblasti. Tokom sastanka poseban naglasak stavljen je na ulogu Gradske uprave Tuzla u pružanju podrške aktivnostima koji doprinose zaštiti zdravlja građana, kao i na planove za realizaciju projekata i edukativnih aktivnosti na području grada Tuzla. Sagovornici su izrazili zadovoljstvo održanim sastankom i razmijenjenim idejama, ističući značaj međuinstitucionalne saradnje s ciljem osiguravanja sigurnijih i kvalitetnijih proizvoda za građane. Grad Tuzla ostaje posvećen očuvanju zdravlja i dobrobiti svojih stanovnika.

Razgovor o procesima digitalne transformacije

Ambasador Republike Austrije u službenoj posjeti Gradu Tuzli



Gradonačelnik Tuzle, dr. sc. Zijad Lugavić, je u Gradskoj upravi upriličio prijem za ambasadora Republike Austrije u Bosni i Hercegovini, Nj.E. Georga Diwalda. Tokom susreta razgovarano je o procesima digitalne transformacije, s posebnim naglaskom na primjenu savremenih tehnoloških rješenja u radu gradske administracije. Istaknuta je važnost digitalizacije kao temelja za unapređenje transparentnosti, efikasnosti i dostupnosti javnih usluga građanima. Gradonačelnik Lugavić i ambasador Diwald razmijenili su mišljenja o dosadašnjoj saradnji te izrazili spremnost za njeno dalje jačanje kroz nove inicijative i zajedničke projekte. Ovaj susret potvrđuje opredijeljenost Grada Tuzle ka razvoju međunarodne saradnje, otvorenosti prema inovacijama i kontinuiranom unapređenju kvaliteta rada gradske uprave.

Grad Tuzla



Održan Info dan u Komori...

Predstavljen Javni poziv vrijedan 28 miliona KM

Grantovi do 200.000 KM za jačanje konkurentnosti privrede



U Kantonalnoj privrednoj komori Tuzla organizovan je Info dan, na kojem je potencijalnim aplikantima prezentovan javni konkurs za odabir korisnika grant sredstava tekućih i kapitalnih transfera za 2026. godinu a kojeg je objavilo Federalno ministarstvo razvoja, poduzetništva i obrta. Kako je pojasnila Edina Kurtić rukovodilac Sektora udruženja Kantonalne privredne komore Tuzla, ukupan iznos javnog poziva je 28 miliona KM. „**Ono što je za na posebno važno jeste podatak da je za mala i srednja preduzeća i obrte planiran iznos oko 22 miliona KM. Također, jako nam je bitno da što veći broj privrednih subjekata sa područja Tuzlanskog kantona, učestvuje u ovom Javnom pozivu koji im daje mogućnost da apliciraju za sredstva namijenjena za proširenje pogona, nabavku nove opreme, unaprjeđenje proizvodnje, uvođenje standarda poslovanja koja zahtijevaju posebna evropska tržišta. Raduje nas činjenica da smo na Info dan u Komori uspjeli okupiti veliki broj privrednih subjekata sa područja Tuzlanskog kantona. Nadamo se da će kompletan proces apliciranja za njih biti uspješan**“, izjavila je Kurtić. Na skupu su detalje javnog poziva privrednicima pojasnili predstavnici Federalnog ministarstva razvoja, poduzetništva i obrta. „Posebno smo u Ministarstvu ponosni na činjenicu da već treću godinu zaredom, apliciranje za grant sredstva Ministarstva, realizujemo online putem, putem online platforme koju smo razvili u saradnji sa UNDP. Broj aplikacija je zaista veliki. Prošle godine smo zaprimili 1332 aplikacije putem online platforme i 452 korisnika su potpisali ugovore. Želim ovdje istaći da je Tuzlanski kanton povukao značajna sredstva, prije svih Građanica Gradačac“, rekao je na skupu u Komori Nevzet Zefo stručni saradnik u pomenutom federalnom Ministarstvu.



Sredstva iz prošlogodišnjeg Javnog poziva dobio je grad Orašje. **“Mi smo prošle godine aplicirali za sredstva koja su namijenjena proširenju poduzetničkih zona. Uspješno smo aplicirali i uspješno smo realizirali projekat. Mi smo našu Poslovnu zonu proširili uz sufinansiranje Federalnog ministarstva razvoja, poduzetništva i obrta, dobili smo sredstva u iznosu od 200.000KM, dodali još naših 100.000KM i uspjeli smo za 60.000 m2 Proširiti Poslovnu zonu. Uz to, uradili smo i Investicijski vodič kako bi promovirali sve ove aktivnosti na kojima smo radili**“, rekao je Franc Kajić pomoćnik gradonačelnika Orašja.



Na kraju, vrlo važna poruka za privrednike stiže iz Komore: **„Za sve privredne subjekte, prije svih naše članice ali i one firme koje žele ući u članstvo Komori, a koji imaju poteškoće prilikom procesa apliciranja i pripreme projekata, Kantonalna privredna komora Tuzla je na raspolaganju da pruži svu potrebnu pomoć, instrukcije da se aplikacija pripremi što kvalitetnije, po propisanim zahtjevima i obrascima i da u konačnici što veći broj privrednika sa područja našeg kantona potpiše Ugovor, dobiju sredstva za koja apliciraju i iskoriste ih u razvoj firme, unaprjeđenje poslovanja, stvaranje povoljnijeg poslovnog okruženja**“, zaključila je Edina Kurtić rukovodilac Sektora udruženja Kantonalne privredne komore Tuzla.

D.K.



Održan seminar u Komori...

“Poslovna žena-Lična efikasnost i Emocionalna inteligencija”

Unaprjeđenje neformalne edukacije žena



Kantonalna privredna komora Tuzla organizovala je jednodnevni seminar na temu: “Poslovna žena-Lična efikasnost i emocionalna inteligencija” (Business woman-Personal effectiveness and emotional intelligence). Kako je istaknuto na skupu, cilj radionice je unaprjeđenje neformalne edukacije žene u oblasti poslovnih vještina, razvoja lične efikasnosti, organizacije, podsticanja motivacije i jačanja samopouzdanja, razvoja emocionalne inteligencije, prakticiranje emocionalnog menadžmenta. **“Hrabrost i inovativne ideje su osnova razvoja žene u poslovanju, a izlazak iz komfor zone, istrajnost i prilagođavanje izazovima dovešće poslovnu ženu do zadatog cilja. Kao najveći izazov preduzetnica izdvaja balansiranje između poslovnih i ličnih obaveza, ali i suočavanje sa predrasudama i stereotipima koji su prisutni u poslovnom svijetu”**, rečeno je na radionici koju je vodio stručni tim ICC/EAB - internacionalni certificirani stručnjaci ICC-a i Elite Academy Balkans. Inače, ICC je organizacija sa puno svakodnevnog i realnog iskustva u različitim oblastima, kao što su korporativno upravljanje i upravljanje ljudskim resursima, komunikacija, komercijalne vještine i tehnike prodaje itd. Za više od 25 godina stečenog iskustva, realizovali su više od 2500 radionica. Razgovaralo se na skupu o ličnim i poslovnim ciljevima, efikasnosti, načinima i metodama poslovne uspješnosti, postavljanju ciljeva i određivanju prioriteta. Zanimljiva izlaganja učesnika izuzetno dobro posjećuju skup za specijalnih gostiju iz oblasti Razvoj malih i srednjih preduzeća u naprednim EU društvima, bila su

i na teme organizacije i izvođenja realizacije kao i vezano za komunikaciju kroz izolaciju konflikta. Zanimljive diskusije su vođene i kada je u pitanju stres menadžment te situacije vezane za Emocionalni menadžment i emocionalnu inteligenciju čiji su kao ključne komponente istaknute emotivna zrelost i upravljanje emocijama.

Poslovne žene okupljene na seminaru u Komori su imale priliku slušati o temama kao što su Empatija i empatijska komunikacija, Afektivni i kognitivni aspekt mentalnog funkcionisanja, Odlučivanje, različitost i pristup različitim situacijama, Prepoznavanje uzroka i posljedica burnout-a, kroz izlaganja specijalne gošće akademkinje Mirsade Hukić specijaliste mikrobiologije, koja je još 2003. godine postala prva članica Evropske akademije nauka iz Bosne i Hercegovine. Zijad Lugavić gradonačelnik Tuzle je istakao značaj održavanja ovakvih radionica te važnost osnaživanja žena u savremenom društvu i izazovima s kojima se svakodnevno susreću. **“Želim vam se zahvaliti jer vi svakodnevno ulažete ogroman trud i nosite teret koji mnogi ne vide, a zbog toga zaslužujete duboko poštovanje i zahvalnost svih nas. Grad Tuzla već dugi niz godina kontinuirano podržava žensko poduzetništvo i poduzetništvo mladih. Svaka edukacija je dobrodošla, posebno u današnjem vremenu i ekonomiji 21. stoljeća, koju karakterišu turbulentnost, brzina, promjene i neizvjesnost. Zato će nam svaka informacija koju danas dobijemo od stručnjakinja koje su ovdje s nama biti od koristi. Kada se suočimo s nekom preprekom, prisjetit ćemo se savjeta koji nam mogu pomoći da donesemo kvalitetnu odluku”**, rekao je gradonačelnik Lugavić. Radionicom je rukovodio Jasmin Hasančević direktor International Creativity Company (ICC) Tuzla a učesnicama radionice se obratio i Nedret Kikanović predsjednik Kantonalne privredne komore Tuzla, organizatora ovog jednodnevnog seminara, U ime ICC Tuzla, Jasmin Hasančević je gradonačelniku Lugaviću i predsjedniku Kikanoviću uručio zahvalnice kao izraz zahvalnosti za dugogodišnju podršku razvoju ovakvih projekata. Radionica je okupila veliki broj poslovnih žena koje svojim znanjem, radom i predanošću daju nemjerljiv doprinos razvoju društva. Program je još jednom potvrdio važnost kontinuirane podrške profesionalnom razvoju žena i njihovoj ključnoj ulozi u ekonomskom i društvenom napretku.

D.K.





Posjeta turske delegacije...

Uskoro prezentacija rješenja u oblasti cyber sigurnosti

Predstavljanje Siberson softverskih rješenja specijaliziranih za sigurnost i zaštitu digitalne imovine firmi i institucija



Kantonalnu privrednu komoru Tuzla posjetila je delegacija turske firme "Siberson". Riječ je o proizvođaču softverskih rješenja specijaliziranih za sigurnost i zaštitu digitalne imovine firmi i institucija. Cilj posjete je sagledavanje mogućnosti za njihovo predstavljanje na bh tržištu, promocija sektora cyber sigurnosti, veza zakonske regulative koja reguliše ovu oblast u Turskoj i Bosni i Hercegovini. Predočili su predstavnici ove firme svoje dosadašnje aktivnosti, iznijeli iskustva iz Turske, pojasnili određene stavke iz turskog Zakona o zaštiti ličnih podataka, ujedno, poredeći određene segmente sa nedavno donosenim Zakonom koji ovu oblast obuhvata u Bosni i Hercegovini. Kako su istakli gosti iz Turske, nude snažnu i pouzdanu zaštitu od cyber prijetnji kroz Sibersonov inovativni pristup i visokokvalitetne i moćne proizvode koji mogu zadovoljiti i nasloženije zahtjeve institucija, malih i srednjih preduzeća. Nedret Kikanović predsjednik Kantonalne privredne komore Tuzla, izrazio je dobrodošlicu gostima iz "Sibersona". Predstavio aktivnosti Komore, privredna kretanja na području Tuzlanskog kantona te sa svojim saradnicima, otvorio gostima nekoliko mogućnosti za saradnju u narednom periodu. **"Naš zadatak je upravo pružanje podrške u dolasku ovakvih prirednih subjekata na naše tržište, njihovo povezivanje sa našim privrednicima iz iste i srodnih djelatnosti i raduje nas da smo adresa na koju su se javili kada je u pitanju njihovo predstavljanje na području Tuzlanskog kantona. Mi smo ih uputili na Univerzitet Finra u Tuzli koji se na visokom nivou bavi ovom oblašću i tamo su već obavili određene kontakte. Raduje nas njihova spremnost da učestvuju u sajmu privrede koji planiramo pokrenuti u Tuzli. Dogovorili samo da prvi korak bude predstavljanje firme Siberson, generalno oblasti**

cyber sigurnosti, njihovih usluga i proizvoda u Komori, privrednim subjektima na području Tuzlanskog kantona", rekao je predsjednik Kikanović.



Nije ovo prvi put da se u Komori tretira ova značajna oblast. Već u ranijem periodu, još 2022. godine bilo je aktivnosti u ovoj oblasti a koje je Komora realizovala u saradnji sa Ministarstvom unutrašnjih poslova Tuzlanskog kantona. Na kraju, dogovoreno je da će Komora pozvati firme svoje članice, partnerske institucije, firme iz oblasti cyber sigurnosti na području Tuzlanskog kantona na prezentaciju za koju se pretpostavlja da bi mogla biti realizovana u drugoj polovini aprila.

D.K.



Otvorena sezona sajamskih aktivnosti...

“Privreda TK” na sajmu turizma u Beogradu

Međunarodni sajam turizma i 21. Međunarodni sajam hotelsko-ugostiteljske opreme Horeca-oprema



U Beogradu je u halama Beogradskog sajma održan 47. Međunarodni sajam turizma. Ovaj događaj važi za jedan od najznačajnijih turističkih susreta u regionu i tradicionalno okuplja veliki broj profesionalaca, predstavnika turističkih organizacija i putnika iz šireg regiona. Sajam je ove godine organizovan pod sloganom „Jedno putovanje, hiljadu priča“, a program je osmišljen tako da je posjetiocima predstavio raznovrsne turističke ponude, od destinacija u Srbiji, regionalnih destinacija, preko svjetskih atrakcija, do specijalizovanih aranžmana za aktivni, eko, porodični i wellness odmor.

Na manifestaciji je ove godine učestvovalo više od 350 izlagača iz oko 18 zemalja, među kojima su turističke agencije, nacionalne turističke organizacije, avio-kompanije, hotelijeri i drugi pružaoci turističkih usluga. Partner ovogodišnjeg sajma bio je Kipar.

Na sajmu je i ove godine učestvovala Kantonalna privredna komora Tuzla koja, sada već po tradiciji, u Beogradu upravo na sajmu turizma, otvara sezonu sajamskih aktivnosti.

Komora je predstavila svoje članice, promovisala njihove proizvode i usluge u okviru zajedničke postavke pod nazivom “Privreda TK”: Ove godine posjetiocima sajma su predstavljeni Turistička zajednica Grada Tuzla, TA “Golden Tours” Tuzla, TA “Transturist” Tuzla, hotel “Vertigos” Tuzla, Turistička zajednica Tuzlanskog kantona, hotel “Tehnograd” Tuzla, restoran “Bardak” Živinice, restoran “Mama Mia Origins” Tuzla, JKP “Pannonica” Tuzla, “Limenka” gradska čevabdžinica Tuzla, Seosko domaćinstvo „Đukarić“, “Kupres Milch” Kupres, pizzeria “Barok” Tuzla, “Palačinkara kod Bagija” Tuzla, Hotel “Terme Ozren” Bosansko Petrovo Selo, hotel “Senad od Bosne” Lukavac.



Upriličeno je nekoliko sastanaka, razgovora sa gostima i izlagačima a oni koji su bili dio komorske postavke i prisustvovali sajmu imali su priliku i za konkretne dogovore. Predstavnici turističke agencije Golden tours Tuzla prisustvovali su mnogobrojnim B2B sastancima sa partnerima iz regije i svijeta, te na ovaj način učvrstila i proširila mrežu poslovnih partnera i kontakata.

„Održali smo brojne sastanke, susreli se sa poznatim turističkim radnicima iz regiona, razmijenili iskustva. Među održanim sastancima, posebno se izdvajaju sastanci sa dugogodišnjim partnerima iz Turske i Egipta. Dugogodišnji partner iz Turske, lokalni turoperator „Mina travel“ na sastanku je predstavio novosti iz antalijske regije, te je dogovorena saradnja sa novim hotelima. Ove sezone, agencija „Golden tours“ Tuzla organizuje charter letove za Antaliju utorkom i petkom iz Tuzle te srijedom i subotom iz Sarajeva. Novost u ponudi naše agencije, a imali smo priliku tu novost promovisati partnerima u Beogradu, jeste Egipat, odnosno ljetovanje u Hurgadi. Letovi za ovu destinaciju će biti realizovani svaki ponedjeljak od 15.6. do 7.9. ove godine. Tim povodom, održan je sastanak sa lokalnim turoperatorom iz Hurgade, agencija „Galaxia tours“, tokom kojeg su potvrđeni detalji saradnje i organizacije predstojeće sezone. Imali smo priliku u brojni susretima i razgovorima uputiti pozive našim prijateljima da dođu u Tuzlu i Tuzlanski kanton, da organizuju ture i posjete Panonskim jezerima i drugim destinacijama u našem kantonu“, izjavio je Asim Bečić vlasnik turističke agencije „Golden tours“ Tuzla.



Važno je pomenuti da je 47. sajam turizma u Beogradu obilježilo više od 30.000 posetilaca, 2.000 B2B susreta oko 700 akreditovanih novinara iz više od 20 zemalja, što je potvrdilo da ovaj sajam ne predstavlja samo priliku za planiranje putovanja, već i važnu platformu za biznis susrete i umrežavanje turističkih profesionalaca, razmjenu iskustava i sklapanje novih partnerstava koja mogu doprinijeti razvoju turističke privrede u regionu. Uz održavanje 47. Međunarodnog sajma turizma, na Beogradskom sajmu je održan i 21. Međunarodni sajam hotelsko-ugostiteljske opreme Horeca-oprema, koji dodatno osnažuje komunikaciju između sektora turizma i ugostiteljstva.

Pripremio: Dino Kalesić



Gasi se bh industrijski div...

„Odluka o gašenju proizvodnje je konačna“

Proizvodnja u lukavačkoj Koksari se gasi - Odluku je donijela Skupština povjerilaca Koksare u stečaju. Odluka je uslijedila nakon što nije pristigla nijedna ponuda potencijalnog strateškog partnera koji bi bio spreman da nastavi proizvodnju



Bez obzira na to što će radnička cjelokupna potraživanja biti prioritarno isplaćena nakon parcijalne prodaje imovine, Sindikat radnika je odluku o gašenju prihvatio s ogorčenjem. Dugo očekivana Skupština povjerilaca Koksare stavila je tačku na bezuspješan proces pronalaska potencijalnog strateškog partnera za nastavak proizvodnje u ovom nekadašnjem industrijskom gigantu. Nije se prijavio ni dosadašnji privremeni strateški partner – fočanski Pavgord, kojeg, očigledno, proizvodnja koksa više ne zanima. Skupština nije imala drugi način nego donijeti odluku da se pristupi procesu zaustavljanja ovih pogona u narednom periodu. „Ono na šta nismo mogli kao Skupština utjecati je pronalazak partnera, kojih za proizvodnju koksa nema. I nismo mogli nikoga natjerati da dalje nastavi rad proizvodnje koksa“ istakao je Almir Bajrić, stečajni upravnik Koksara Lukavac u stečaju, javio je FTV. Odluka o gašenju proizvodnje je konačna. Bez obzira na protivljenje nezadovoljnih radnika, takva odluka će morati biti realizirana.

„Izražavam veliku zabrinutost zato što su radnici, pogotovo inženjeri i rukovodioci posebno naglasili da, ukoliko se oktobarska i deset dana novembarske plata ne isplati, što je otišlo u stečajnu masu, da neće pristupiti gašenju. Radnici ni psihički, kad čuju ovu vijest, nisu spremni za taj poduhvat“, kazao je Ermin Halilović, predsjednik Sindikata radnika Koksara Lukavac u stečaju.

„Otvoreno govorim da je ovo plansko zaustavljanje Koksare. Ovo se moglo na drugi način uraditi. Najviše krivim Vladu kantona, ona određuje menadžerstvo“, navodi Nurdin Đuzić, bivši predsjednik Sindikata Koksara Lukavac.

„Odluka o gašenju se ne može zaustaviti. To sada moraju pratiti institucije i drugi organi jer ne može se dozvoliti da se ugrozi neki proces usljed nekontrolisanog dijela. Očekujem da neće biti problema. U Zenici je ugašena koksna baterija potpuno sigurno, na jedan jednostavan način“, istakao je Bajrić. Cjelokupna radnička potraživanja koja su u ukupnom iznosu oko 7,5 miliona maraka su u višem isplatnom redu i bit će prioritarno u potpunosti isplaćena. Sve ovisi o parcijalnoj prodaji imovine koja će uslijediti vrlo brzo.

„Ići će se s pribavljanjem svih ponuda o prodaji pravnog lica ili prodaji društva ili pojedinačno i shodno zainteresovanosti, koje će sigurno biti, da li za cijelo pravno lice ili pojedinačno, odmah će se u martu objaviti poziv za prodaju, tako da očekujemo da već u aprilu imamo unovčenu imovinu iz koje ćemo moći radnicima odmah isplatiti plate“, dodao je Bajrić.

Od 660 miliona maraka ukupno prijavljenih potraživanja, priznato je 550 miliona maraka. Najviše se duguje britanskom Moorgate oko 300 miliona maraka i hrvatskom Erdal-trading oko 130 miliona maraka.

biznisinfo.ba

“Vlada TK nije nadležna niti odgovorna za stanje u Koksari”



Vlada Tuzlanskog kantona i premijer TK nemaju nikakva ovlaštenja niti nadležnosti za imenovanje organa uprave (menadžmenta) Koksare d.o.o. Lukavac, niti su na bilo koji način mogli utjecati na poslovne planove, odluke i poslovanje ovog privrednog društva, te iz toga razloga ne mogu imati nikakvu odgovornost za teško stanje u kojem se ovo privredno društvo trenutno nalazi! Ova je rečenica srž odgovora na pitanja o temi “Koksara” ili informacija i izjava za javnost/medije, koje bismo davali i koje ćemo davati na ovu temu, a koja kao takva jedina odgovara istini, naveo je premijer Tuzlanskog kantona Irfan Halilagić. “Sve ostalo što se pojavljuje u javnom prostoru, isključivo na društvenim mrežama, politički je motivisano i kreirano u redovima lokalnih (lukavačkih) političkih krugova ili porodičnih kruga, njihovih lažnih novinarskih stranica (frontova, insajdera, a-portala itd.) i armije lažnih Facebook profila.



Posebno se ovo odnosi na neistine, preciznije i tačnije LAŽI, o koruptivnim radnjama, kriminalu i sticanju imovinske koristi, te javni linč organiziran na društvenim mrežama i komentarima, sa jednim jednim ciljem: Lična diskreditacija i izazivanje netrpeljivosti javnosti i radnika Koksare prema Irfanu Halilagiću, mišljenja je. Prema njegovim riječima, neizvjesna sudbina Koksare, nestabilno poslovanje, raznorazni tereti, a posebno stotine miliona dugovanja, Koksaru su pogodili mnogo, mnogo prije ovog premijera i ove vlade. "Posljednjih godina, nakon raskida poslovne veze sa indijskim partnerom, ovu su kompaniju "u životu" održavali nekoliko dobavljača ili preciznije rečeno finansijera, koji su mjesec za mjesecom osiguravali potrebna višemilionska sredstva za sirovine odnosno za njen kakav-takav rad i funkcionisanje. Isti su također, u uslovima složenog stečajnog postupka, bili odlučujući u odabiru i imenovanju organa rukovođenja odnosno uprave ovog privrednog društva", dodao je. Nakon što je Koksara izgubila ugovor / dogovor o plasmanu i prodaji koksa sa višedecenijskim partnerom i kupcem Željezarnom Smederevo, spas za opstanak proizvodnje i same fabrike je pronađen u Željezari Zenica iz razloga što je tamošnja (ArcelorMittal) zenička koksara nakon 130 godina ugašena i prestala sa radom. U protekloj godini, nakon što je Željezara Zenica promijenila vlasnika, te je najavila i trenutno sama prolazi kroz neizvjestan nastavak rada i proizvodnje čelika, sve navedeno je doprinijelo bitno smanjenoj potrebi za proizvodnjom koksa, ali nažalost, i ubrzanom prestanku rada lukavačke Koksare. "Važno je podcrtati, Vlada TK nije imala nikakvog nadzora, uvida ili utjecaja na rad i poslovanje ovog preduzeća u stečaju, niti je ikada razmatrala ili donosila bilo kakve akte / odluke koje se tiču imenovanja, poslovanja ili funkcionisanja preduzeća. Jednako tako, vlada nije imala uvid niti je mogla na bilo koji način odlučivati i raspolagati sa dobiti ovog privrednog društva, onda kada je ono ostvarivalo u milionskim iznosima. Naprotiv, vlada(e), ministri i premijer(i) su pozivani i prozivani isključivo i samo onda kada bi se u ovom preduzeću pojavile nevolje ili krize, kako bi se na ovaj ili onaj način intervenisalo i u datom momentu riješio neki trenutni problem, prepreka ili krizna situacija", istakao je premijer Halilagić. "Uvijek smo se, prije svega zbog poštovanja prema stotinama radnika ali i zbog samog značaja Koksare za privredu cjelokupne države, odazivali tim pozivima te u skladu sa mogućnostima, nadležnostima i našim institucionalnim kapacitetima, pomagali kako smo mogli. Nažalost, u slučaju ovog posljednjeg dešavanja i razvoja situacije, izvjesno je da ne postoji nikakav zakonom definisani način, kojim bi se Koksara spasila od odluka koje su donesene", zaključio je premijer TK.

Vlada TK će učiniti sve da tranziciju za radnike Koksare učini što bezbolnijom

Vlada Tuzlanskog kantona učinit će sve što je u okvirima njene moći i nadležnosti kako bi pomogla u procesu socijalnog zbrinjavanja radnika lukavačke Koksare, koji usljed gašenja ovog nekadašnjeg giganta ostaju bez radnog angažmana. Ovo

je dogovoreno na interesornom sastanku, organiziranom na inicijativu premijera TK Irfana Halilagića, a kojem su prisustvovali i gradonačelnik Lukavca Edin Delić, stečajni upravnik u Koksari Almir Bajrić, ministri u Vladi TK Fadil Alić i Suad Mustajbašić, direktor Službe za zapošljavanje Miralem Softić, te saradnici i predstavnici radnika Koksare.



„Vlada Tuzlanskog kantona hoće i mora učiniti sve kako bismo ovaj proces tranzicije za radnike Koksare učinili što lakšim i prihvatljivijim. Programi za penzionisanje, kao i programi ponovnog zapošljavanja moraju biti u službi ovih ljudi. Također, zajedno sa gradonačelnikom već razgovaramo sa brojnim privrednicima u Lukavcu, ali i šire, da preuzmu dio radno sposobnih dosadašnjih uposlenika Koksare i onih radnika koji su voljni nastaviti svoj socijalni angažman. Također, tu su i programi podrške samozapošljavanju, otvaranju novih poslova ili obrta, na koje će ti radnici, ako budu željeli moći aplicirati, a za one koji više nisu u stanju ili se ne žele ponovno zaposliti, prilagodit ćemo naše socijalne programe kako bismo im pomogli lakši odlazak u zasluženu penziju“, rekao je premijer Halilagić. S obzirom da je stečajni upravnik Bajrić kao prioritet istaknuo penzionisanje 20-tak radnika koji ispunjavaju uslove za odlazak u penziju, dana je dogovoreno da u naredim danima Koksara Ministarstvu za rad i socijalnu politiku dostavi spisak radnika sa potrebnim podacima kako bi se što prije raspisao javni poziv i konkretno krenulo sa ovom procedurom. Uporedo sa ovim dogovoreno je da se provode i druge aktivnosti i pripremaju spiskovi u cilju ponovnog zapošljavanja preostalih radnika Koksare. Također, istaknuto je da se u ovaj proces, sa aspekta zakonske odgovornosti, ali i finansijske raspoloživosti mora uključiti i Vlada Federacije BiH, te će u danima koji slijede, biti upućen i službeni zahtjev da i Vlada Federacije BiH osigura određena sredstva i u saradnji sa Zavodom za zapošljavanje pomogne procese socijalnog zbrinjavanja radnika Koksare.

Odjeljenje za informisanje Vlade TK



2. Poljoprivredni forum TK...

“Trendovi koji oblikuju budućnost agrobiznisa”

Sagledavanje savremenih trendova u poljoprivrednoj proizvodnji



“Trendovi koji oblikuju budućnost agrobiznisa” naziv je 2. Poljoprivredni forum Tuzlanskog kantona koji je održan U Kantonalnoj privrednoj komori Tuzla. Osnovni cilj ovog skupa bio je sagledavanje savremenih trendova u poljoprivrednoj proizvodnji. Bila je ovo prilika da se istakne značaj digitalizacije, novih tehnologija i boljeg plasmana proizvoda kao ključnih faktora za jačanje konkurentnosti domaćih proizvođača.

“Novi trendovi u agrobiznisu i poljoprivredi predstavljaju odgovor na sve izraženije izazove tržišta i potrebu za većom produktivnošću i održivosti proizvodnje. Najviše se odnosi na čuvanje poljoprivrednih proizvoda i njihov plasman putem raznih inovativnih metoda. O tim stvarima smo razgovarali na Forumu”, izjavio je Senad Hećimović predsjednik Saveza udruženja za poljoprivredu TK. Forumu su prisustvovali profesori Poljoprivedno-prehrambenog fakulteta Sarajevo, Vlade Tuzlanskog kantona i domaćina Kantonalne privredne komore Tuzla. Kako je istakla Aleksandra Nikolić profesorica iz Sarajeva, umjetna inteligencija je alat koji olakšava rutinske poslove i poljoprivrednim proizvođačima omogućava veću posvećenost razvoju i unaprjeđenju proizvodnje.



“Mi imamo proizvodnje koje su digitalno spremene da prihvate mnogo toga. S druge strane imamo i male proizvođače koji nisu baš toliko spremni. Ipak, moram da

kažem da 5.0 znači uključivost svega, predvodnici su oni koji su jači a mi drugi koji smo malo manje spremni, mi ćemo to da pratimo. Poenta je da moderna tehnologija omogućava uključivanje svih, tu je vještačka inteligencija koja treba nama da pomogne da lakše savladamo to što ne znamo”, izjavila je profesorica Nikolić. Senad Hodžić predsjednik Saveza pčelara TK ističe kako se ovaj Savez već izvjesno vrijeme oslanja na digitalne vage i time smanjuje fizički odlazak na pčelinjake i time se, kako je istakao, znatno smanjuju troškovi. “U TK je oko 1300 pčelara sa oko 40.000 košnica i 13 pčelarskih udruženja. Svima nama te digitalne vage daju egzaktnije pokazatelje, značajne parametre kada je u pitanju proizvodnja meda”, rekao je Hodžić.



Suad Selimović sekretar Saveza istakao je da se poljoprivreda u TK i BiH nalazi pred izazovima ali istovremeno i pred brojnim prilikama za razvoj. “Upravo ovakvi forumi prilika su za razmjenu iskustava i ideja, s ciljem jačanja domaće proizvodnje i stvaranja održivog i konkurentnog agrobiznisa”, istakao je sekretar Selimović na 2. Poljoprivrednom forumu Tuzlanskog kantona koji je održan U Kantonalnoj privrednoj komori Tuzla.

D.K.



Promocija monografije autora Refika Hodžića...

„Zaštićena šumska područja u TK

Sistematski i precizno navedena sva šumska područja u Tuzlanskom kantonu



U Kantonalnoj privrednoj komori Tuzla promovisana je monografija „Zaštićena šumska područja u Tuzlanskom kantonu“ autora Refika Hodžića. Riječ je o monografiji u kojoj su sistematski i precizno navedena sva šumska područja u Tuzlanskom kantonu koja se vode kao zaštićena po različitim osnovama. Kako je istaknuto na skupu, Tuzlanski kanton je jedan od rijetkih kanton koji se može pohvaliti da ima 20% zaštićenih šumskih područja, čime je premašen ciljni procenat od 18,5% a koji predviđa Prostorni plan Federacije Bosne i Hercegovine. Jedna petina šuma i šumskih zemljišta na području Tuzlanskog kantona je zaštićena po različitim osnovama i preostaje samo da ih se uvede u sistem. **“Kroz ovaj projekat, Ministarstvo poljoprivrede, šumarstva i vodoprivrede Tuzlanskog kantona, Uprava za šumarstvo Tuzlanskog kantona i JP “Šume TK” Kladanj, žele da stvore ličnu kartu koja će sadržavati sve tačne podatke o zaštićenim šumskim područjima”,** izjavio je Refik Hodžić autor monografije.



O monografiji je kao promotor govorio i akademik Sead Vojniković: “Ova literatura otvara jedan neosvijetljeni prostor

zaštite prirode i kao takva ima veliki značaj ne samo za šumare, nego i za one koji gospodare prostorom, ljubitelje prirode, zaštitare prirode”.

Fedahija Ahmetović ministar poljoprivrede, šumarstva i vodoprivrede Tuzlanskog kantona istakao je na skupu odlučnost od prve ideje, da se pruži podrška ovom projektu. **“Ministarstvo poljoprivrede, šumarstva i vodoprivrede Tuzlanskog kantona, Uprava za šumarstvo Tuzlanskog kantona i JP “Šume TK” Kladanj stoje iza ove monografije, finansijski i na svaki drugi način. ovo je značajno djelo koje dokumentuje sva naša zaštićena područja pa čak i ona za koja javnost do sada nije znala”,** rekao je ministar Ahmetović.



Kako je rečeno na promociji, zahvaljujući radu šumarskih stručnjaka, prije svega uposlenika JP “Šume TK” Kladanj, raste procenat zaštićenih šuma i šumskog zemljišta, što za područje sa izrazito zagađenim zrakom, kao što je slučaj sa područjem Tuzlanskog kantona, ima nemjerljiv značaj i direktan uticaj na poboljšanje zdravlja stanovništva.

D.K.

Iz Ministarstva trgovine, turizma i saobraćaja...

Unaprjeđenje turističke ponude TK

Prezentovana više jezična aplikacija sa mapiranjem turističkih destinacija Tuzlanskog kantona



Ministarstvo trgovine, turizma i saobraćaja Tuzlanskog kantona prezentovalo je višjejezičnu aplikaciju za mapiranje turističkih destinacija na području Tuzlanskog kantona. Aplikacija ima za cilj unaprijediti turističku ponudu, promovirati kulturno-historijsko naslijeđe i prirodne ljepote Tuzlanskog kantona te olakšati pristup informacijama za građane i posjetioce. Nakon dužeg perioda priprema Tuzlanski kanton, prema riječima resornog ministra Almira Žilića, konačno ima okvir turističkih potencijala koji predstavlja temelj kvalitetnog turizma.


“Možda smo jedini u Federaciji BiH koji su napravili iskorak vezan za mapiranje turističkih potencijala. Referirajući se sada na svo dešavanje oko Aerodroma Tuzla, oko lokalnih turističkih zajednica koje su u zadnje vrijeme vrlo aktivne, turistički potencijali su izuzetni u Tuzlanskom kantonu ali realno mi do danas dana nemamo podatke gdje šta imamo. Ovo će nam pomoći da turistima i lokalnim i kantonalnim turističkim zajednicama omogućimo da javnosti i potencijalnim turistima pokažu ono što imamo i sigurno obogatimo turističku ponudu u Tuzlanskom kantonu”, najavio je ministar Žilić.

Na prezentaciji je predstavljen način korištenja aplikacije te planovi za njenu promociju i uključivanje lokalnih zajednica i turističkih aktera.

Belmin Malagić predstavnik konsultantske kompanije „Remote“ d.o.o. Sarajevo koja je načinila aplikaciju, kaže da su mapirali sve turističke resurse sa područja Tuzlanskog kantona u jednu mapu i dobili bazu podataka od koje je načinjena turistička aplikacija.

“Ta turistička aplikacija sadrži sve one turističke resurse koje smo ranije identifikovali, valorizovali i mapirali te za njih napravili kratke opise, slike i sve bitne informacije

za turiste. Tako da su mapirani i prikazani oni primarni turistički resursi koji uključuju prirodne turističke destinacije, kulturno-historijsko nasljeđe, vjerske objekte, manifestacije i događaje i smještajne ugostiteljske objektena području Tuzlanskog kantona. Svi su kategorizirani prema tipovima i turistima olakšana pretraga i snalaženje na području TK”, rekao je na prezentaciji Malagić.



Aplikacija je, rečeno je na prezentaciji, prilagođena i domaćim i stranim turistima i ima opcije bosanskog, njemačkog i engleskog jezika te je ostavljena mogućnost unaprjeđenja kroz unos novih podataka, slika i novih turističkih resursa.

Odjeljenje za informisanje
Vlade Tuzlanskog kantona



Iz Vlade TK...

Jasnija pravila i snažniji razvoj turizma u TK

Informacija sa 46. redovne sjednice



Vlada Tuzlanskog kantona je na 46. redovnoj sjednici sjednici utvrdila nacrt Zakona o izmjenama i dopunama Zakona o turističkim zajednicama, kojim se unapređuje rad turističkih zajednica i stvaraju jasniji, efikasniji i profesionalniji uslovi za razvoj turizma na području Kantona. Predloženim izmjenama i dopunama preciznije se definišu obaveze i nadležnosti turističkih zajednica i njihovih organa, čime se osigurava lakša primjena zakona, veća transparentnost u radu i bolje razumijevanje uloga svih učesnika u turističkom sistemu. Poseban naglasak stavljen je na racionalnije i svrsishodnije korištenje sredstava prikupljenih kroz članski doprinos, s ciljem ubrzanijeg razvoja turističke djelatnosti i jačanja turističke ponude Tuzlanskog kantona.

Zakon donosi značajne pozitivne pomake u profesionalizaciji rada turističkih zajednica, kroz obavezno osnivanje turističkih ureda i jasno definisanu ulogu voditelja turističkog ureda. Time se unapređuje operativna efikasnost, smanjuje koncentracija ovlaštenja u jednoj osobi i jača odgovorno upravljanje. Izmjenama se dodatno sprječava dupliranje članstva u organima turističkih zajednica, čime se jača integritet sistema i osigurava ravnomjernija raspodjela odgovornosti. Također, unapređuje se uloga nadzornih odbora i obaveza izvještavanja, što doprinosi većem stepenu kontrole i povjerenja u rad turističkih zajednica. Posebna vrijednost zakonskih izmjena ogleda se u jačanju uloge turističkih zajednica u edukaciji kadrova u turizmu, što predstavlja ključni preduslov za dugoročni i održivi razvoj ove privredne grane. Ujedno se preciznije uređuje položaj dobrovoljnih članova i njihovo učešće u radu turističkih zajednica, čime se potiče veća uključenost lokalne zajednice i turističkih subjekata. Zakonom se jasno uređuje i način prestanka rada turističkih zajednica, kako na lokalnom tako i na kantonalnom nivou, čime se dodatno jača pravna sigurnost i stabilnost sistema. Utvrđivanjem nacrt Zakona o izmjenama i dopunama Zakona o turističkim zajednicama, Vlada Tuzlanskog kantona potvrđuje opredijeljenost ka stvaranju uređenog, transparentnog i razvojno orijentisanog turističkog sektora, koji može dati snažniji doprinos ukupnom ekonomskom razvoju Kantona.

Vlada TK podržala snažan razvojni plan Aerodroma Tuzla



Vlada TK je 46. redovnoj sjednici prihvatila Plan poslovanja JP „Međunarodni aerodrom Tuzla“ d.o.o. za 2026. godinu. Operativni ciljevi za 2026. godinu usmjereni su na povećanje aviosaobraćaja, unaprjeđenje finansijskog poslovanja i razvoj ljudskih resursa. Subvencioniranje aviokompanija, proširenje ruta i privlačenje novih partnera prepoznati su kao ključni prioriteti, dok se pažnja posvećuje i jačanju kompetencija zaposlenih kroz dodatne programe obuke. Operativni plan poslovanja za 2026. godinu definira jasne prioritete koji uključuju razvoj aviosaobraćaja, unaprjeđenje ljudskih resursa i jačanje finansijskog upravljanja. Kroz subvencioniranje aviokompanija i proširenje aviolinija planira se povećanje prometa putnika, dok se privlačenje novih avioprijevoznika vidi kao faktor za jačanje tržišne pozicije aerodroma. Istovremeno, kroz plan ljudskih potencijala prepoznaje se važnost kontinuirane edukacije i stručnog usavršavanja zaposlenika,

što će direktno utjecati na kvalitet usluga. Kada su u pitanju infrastrukturni projekti planirani za 2026. godinu, treba istaći da oni predstavljaju strateške investicije koje će značajno utjecati na daljnji razvoj aerodromske infrastrukture, omogućiti efikasnije opsluživanje aviokompanija i putnika, te dodatno unaprijediti konkurentnost Međunarodnog aerodroma Tuzla. Planirane aktivnosti obuhvataju proširenje postojećih platformi i manipulativnih površina, unaprjeđenje navigacijskih i pratećih tehničkih sistema, izgradnju i rekonstrukciju pristupnih saobraćajnih infrastrukture, kao i opremanje VIP salona. Pored funkcionalnih i sigurnosnih aspekata, projekti uključuju i uređenje hortikulture i vizualnog identiteta aerodroma, s ciljem estetskog unaprjeđenja prostora i stvaranja ugodnijeg ambijenta za putnike i korisnike usluga. Realizacijom navedenih projekata dodatno će se učvrstiti pozicija Međunarodnog aerodroma Tuzla kao ključne infrastrukturne tačke u sistemu avio-saobraćaja Bosne i Hercegovine, te stvoriti stabilni preduslovi za održivi rast, privlačenje novih avioprijevoznika i povećanje ukupnog obima saobraćaja. Ono što se izdvaja kao zanimljiv projekat svakako je planirana ugradnja svjetala Touch-down zone (TDZ) na središnjoj liniji piste, kao dio navigacionog sistema ILS CAT 3, za što je iz Budžeta TK osigurano skoro 1,6 miliona KM, kao i nadogradnja prilaznih svjetala „SIDE ROW“ koja će se protezati od praga piste 300 metara prema zapadnoj strani Aerodroma, u dva reda pored centralnih prilaznih svjetala, za što je iz budžeta TK i FBiH osigurano nešto više od 1,4 miliona KM.

Odjeljenje za informisanje



Najava sajamskih aktivnosti...

Sajam „LIST“ Lukavac, 7-9.5.

24. Međunarodni sajam
turizma i ekologije



Poštovani izlagači, sa zadovoljstvom Vas pozivamo da učestvujete na 24. Međunarodnom sajmu turizma i ekologije „LIST“, koji će se održati u Lukavcu od 07. do 09. maja 2026. godine. Sajam „LIST“ je vodeća regionalna platforma u oblasti turizma, ekologije i održivog razvoja, okupljajući stručnjake, proizvođače, institucije i organizacije iz Bosne i Hercegovine, regiona i inostranstva. Ovaj događaj pruža jedinstvenu priliku za vidljivost, promociju i uspostavljanje strateških poslovnih kontakata.

Zašto učestvovati?

- Direktna promocija proizvoda i usluga pred relevantnom publikom
- Mogućnost sklapanja novih poslovnih partnerstava i širenja mreže kontakata
- Učešće u takmičenjima, prezentacijama i degustacijama, što dodatno ističe Vaše proizvode
- Fokus na domaću, ekološku i autentičnu proizvodnju, koji podiže kredibilitet i prepoznatljivost brenda

Na Sajmu učestvuju:

- Turističke zajednice, agencije, hoteli i ugostitelji
- Domaći proizvođači hrane, pića, suvenira i rukotvorina
- Privredni subjekti, institucije, udruženja i obrazovne ustanove
- Izlagači iz BiH, regiona i inostranstva

Ne propustite priliku da Vaše usluge ili proizvodi budu dio prestižnog događaja koji već više od dvije decenije afirmiše turizam, ekologiju i održivi razvoj u regiji.

Više informacija: lukavacki_sajam@yahoo.de, +387 63 391 827; +387 61 721 561 ili +387 35 574 700

Radujemo se Vašem prisustvu i učešću na Sajmu „LIST“, mjestu gdje se stvaraju poslovne prilike i grade dugoročne veze.

Organizacioni odbor „LIST“

“III SIF” i “Arhi Bau Expo BiH”, 13-15.5.2026.

Najveći regionalni sajam posvećen industriji
građevinarstva, mašinstva i metalne industrije



Sarajevo Industry Fair - Sajam industrije, građevinarstva, mašinstva i metalne industrije biće održan od 13. do 15. maja 2026. godine u Centru Skenderija u Sarajevu. Riječ je o najvećem regionalnom sajmu posvećenom industriji, građevinarstvu, mašinstvu i metalnoj industriji. Očekuju vas inovacije, savremene tehnologije, poslovno umrežavanje i prezentacije najnovijih rješenja iz ovih sektora. “III Sarajevo Industry Fair” je idealna prilika za profesionalce i kompanije, mjesto susreta znanja, tehnologije i budućih partnerstava. Pozivamo vas da učestvujete kao izlagači i predstavite svoje proizvode i tehnologije. Iskoristite jedinstvenu poslovnu priliku i budite dio industrijske priče koja oblikuje budućnost. Prijave su otvorene do 10.2.2026. godine. Osigurajte svoje mjesto među liderima industrije – predstavite svoje inovacije, povežite se s ključnim akterima i budite dio jedne od najvažnijih industrijskih manifestacija u regiji. Prijave na <http://www.sarajevskisajam.ba>, sarajevoindustryfair@gmail.com.

Sarajevo: “Arhi Bau Expo BiH 2026”, 13-15.5.

Pozivamo vas da uzmete učešće na Međunarodnom specijaliziranom sajmu građevinarstva, projektovanja, materijala, opreme, mehanizacije i tržišta nekretnina ARHI BAU EXPO BiH 2026, koji će se održati od 13. do 15. maja 2026. godine u Dvorani “Mirza Delibašić” – Skenderija, Sarajevo, pod sloganom: „Od projekta do objekta, od vizije do stvarnosti!“ ARHI BAU EXPO BiH 2026 zamišljen je kao jedinstven, prvi i najveći specijalizirani sajamsko-konferencijski događaj iz oblasti građevinarstva u Bosni i Hercegovini nakon više od dvije decenije, s jasnim ciljem da postane centralna i referentna platforma za razvoj, promociju i međunarodno povezivanje građevinskog sektora BiH. Sajam će okupiti kompanije, institucije i stručnjake iz cjelokupnog spektra građevinske industrije: arhitekture i projektovanja,

- visokogradnje i niskogradnje, inženjeringa i izvođenja radova,
- proizvodnje i distribucije građevinskih materijala, sistema i opreme,
- mehanizacije i savremenih tehnologija, digitalizacije, pametne i održive gradnje, razvoja, prodaje i upravljanja nekretnostima

Posebnu vrijednost događaju daje aktivno učešće relevantnih instituta, stručnih organizacija, akademske zajednice i javnih institucija, čime se sajmu osigurava visok stručni, institucionalni i dugoročni razvojni karakter.

U okviru sajma biće održana i trodnevna stručna konferencija, fokusirana na ključne teme savremenog građevinskog sektora uključujući inovacije i nove tehnologije u gradnji, savremena projektantska i izvođačka rješenja, održivu i certificiranu gradnju, zakonodavni i regulatorni okvir, standarde, certifikaciju i kontrolu kvaliteta, aktuelne izazove sektora i konkretna tržišna rješenja.



“Banjaluka Expo 2026”, 13-15.5.2026.

Međunarodni sajam privrede



Međunarodni sajam privrede „BANJA LUKA EXPO 2026“ predstavlja savremenu međunarodnu izložbu u oblasti građevinarstva, metalne i elektro industrije, drvne industrije, tehnike i kućanskih aparata, IT sektora – elektronike i robotike, nekretnina, arhitekture i projektovanja. Svoje učešće će uzeti i izlagači iz bankarskog sektora, mikrokreditnih organizacija, osiguravajućih društava te ostalih finansijskih institucija iz čitave Bosne i Hercegovine.

Velika međunarodna sajamska manifestacija će se održati u organizaciji kompanije „RS Consulting and Trade d.o.o. Banja Luka“ i kompanije „Elite Fair d.o.o. Banja Luka“ uz institucionalnu podršku Vlade Republike Srpske, Ministarstva vanjske trgovine i ekonomskih odnosa BiH, Spoljnotrgovinske komore BiH, Privredne komore Republike Srpske i grada Banja Luke.

Međunarodni sajam privrede “Banjaluka EXPO” biće održan od 13. do 15. maja u kompleksu Univerzitetskog centra - Kampus u Banjaluci.

Sajam “Ekobis” Bihać, 10-13.9.

22. međunarodni sajam ekologije



Poštovani i dragi izlagači, posjetitelji i partneri, 22. međunarodni sajam ekologije - EKOBIS 2025 će se održati od 10. do 13. septembra 2026. godine na lokaciji Sportske dvorane “Luke” u Bihaću.

Sajam EKOBIS prate i 5. međunarodni sajam turizma - EKOTOUR, te 6. međunarodni sajam obrta. Na sajmu se očekuje više od 200 izlagača iz zemlje i regije koji će prezentirati svoje proizvode, usluge i projekte s posebnim naglaskom na održivost i ekologiju, očuvanje okoliša, inovacije i digitalizaciju. Mali privrednici i poljoprivredni proizvođači će na pratećem sajmu obrta ponuditi tradicionalne i organske proizvode, dok će prateći sajam turizma - EKOTOUR biti izvrsna platforma za promociju destinacija, turističkih potencijala, ponuda i aranžmana. Raznovrstan i bogat program ovogodišnjeg sajma EKOBIS uključivat će konferencije, prezentacije, okrugle stolove i panel diskusije te sportske, kulturne i zabavne događaje.

Generalni sponzor sajma su Vlada Unsko-sanskog kantona i Ministarstvo privrede Unsko-sanskog kantona, a suorganizator Grad Bihać. Podršku sajmu pružaju Ministarstvo vanjske trgovine i ekonomskih odnosa BiH, Federalno ministarstvo poljoprivrede, vodoprivrede i šumarstva, Agencija za vodno područje rijeke Save, Vanjskotrgovinska/Spoljnotrgovinska komora BiH i Privredna/Gospodarska komora FBiH. Radujemo se ponovnom viđenju i druženju na 22. EKOBIS-u!

D.K.



Najava sajмова u regiji...

“SEEBBE” Beograd 2026, 21-24.4.

50. sajam građevine



Beogradski sajam dočekuje Jubilarni 50. Međunarodni sajam građevinarstva SEEBBE 2026 najveći sajam iz oblasti građevinarstva u regionu jugoistočne Evrope. Izlagački program obuhvata sve segmente građevinske djelatnosti: istraživanje i projektovanje, izgradnja i održavanje objekata, visokogradnja, niskogradnja, najsavremeniji materijali, građevinske mašine, uređaji i alati, informacione tehnologije, najsavremenije sisteme gradnje, opremanje objekata i enterijera. Nove investicije u regionu kao i lansiranje tehnoloških inovacija, naročito vezanih za održivu izgradnju, energetske efikasnost i efikasnost korišćenja resursa, uticaj na okolinu i zdravlje ljudi, materijali i procesi budućnosti privlače veliki broj posjetilaca zainteresovanih za komercijalnu i stambenu izgradnju i unutrašnje radove kako za novogradnju, tako i za renoviranje i modernizaciju.

Pet razloga za izlaganje na sajmu SEEBBE:

1. Ostvarite nove kontakte
2. Predstavite svoje proizvode i inovacije
3. Osvojite nova tržišta
4. Ostvarite cilj
5. Nađite inspiraciju za nove projekte

Budućnost građevinarstva je budućnost vašeg uspjeha!

Iskoristite sve prednosti moćne sajamske mreže za vaš uspjeh i na vrijeme rezervišite svoj izlagački prostor na sajmu SEEBBE 2026.

Budite dio događaja koji povezuje!

DOBRO DOŠLI!

“Biam&Zavarivanje” Zagreb, industrijski sajmovi 14-17.4.

Industrijsko srce regije kuca u Zagrebu



Od 14. do 17. aprila 2026. Zagrebački velesajam postaje središnje mjesto susreta industrije, inovacija i znanja! Održava se novo izdanje jedinih hrvatskih industrijskih sajmova okupljajući vodeće stručnjake, izlagače i posjetitelje iz cijelog svijeta. Sajmovi su u 2024. godini bili najveći u posljednjih deset godina, po broju izlagača i veličini izložbene površine. Stoga se, sukladno preliminarno iskazanom interesu i zadovoljstvu prethodnim izdanjem, u 2026. godini sajam širi na dodatne paviljone.

Spojeni u snažnu industrijsku platformu, BIAM - 28. međunarodni sajam alatnih strojeva i alata te ZAVARIVANJE - 31. međunarodni sajam zavarivanja i antikorozivne zaštite, predstavljaju ključne događaje za sve uključene u proizvodne, obradne i tehnološke procese.

Što vas očekuje:

- prezentacije najnovijih tehnologija i proizvodnih sustava
- svakodnevna stručna predavanja i radionice
- međunarodne konferencije
- Industrijski inkubator - uspješan koncept koji spaja budućnost industrije i obrazovanje (promocija zanimanja u industriji i povezivanje poslodavaca s akademskom zajednicom)
- Regionalno okupljanje privrednika i profesionalaca iz ovih sektora

D.K.



Novosti...

Call Management centar za informacije o PIO

Dodatno unaprjeđenje komunikacijskih procesa – implementiran Call Management centar



Federalni zavod za mirovinsko i invalidsko osiguranje uspješno je realizirao projekt implementacije Call Management centra s ciljem unaprjeđenja komunikacije te pružanja brže i kvalitetnije usluge osiguranicima i korisnicima Zavoda. Novo rješenje omogućuje učinkovitije upravljanje dolaznim pozivima, bolju dostupnost informacija te znatno ubrzanje komunikacijskih procesa. Na taj način osigurava se viša razina korisničke podrške, uz usmjereniju i precizniju komunikaciju, što će rezultirati bržim dobivanjem informacija u vezi s ostvarivanjem prava iz mirovinskog i invalidskog osiguranja. Call centrom obuhvaćeni su pozivi koje

korisnici upućuju na broj centrala, u sjedištu Federalnog Zavoda MIO/ PIO u Mostaru 036 445 600, te , te broj 033 723 100 u Ložioničkoj ulici br. 2 u Sarajevu, dok operatori sustava imaju mogućnost preusmjeriti pozive prema svim službama Zavoda. Radi unaprjeđenja same usluge, razgovori koje korisnici ostvare sa službenicima Zavoda snimaju se. Uvođenje Call Management centra dio je kontinuiranih aktivnosti Federalnog zavoda MIO/ PIO usmjerenih na modernizaciju poslovnih procesa i podizanje kvalitete usluga uz primjenu suvremenih ICT rješenja. Podsjećamo kako je ranije na web-stranici Zavoda implementirana i platforma za izravno postavljanje upita nadležnim službama, čime je korisnicima omogućeno da se brzo i jednostavno, bez potrebe dolaska u službene prostore Federalnog Zavoda MIO /PIO, informiraju o statusu svojih predmeta, kao i o drugim pitanjima iz oblasti mirovinskog i invalidskog osiguranja. Implementacijom Call Management centra, zajedno s postojećom web-plaformom za upite, Federalni zavod je znatno poboljšao komunikacijske procese te usluge Zavoda učinio lakše dostupnima, što će, vjerujemo, za rezultat imati izraženije zadovoljstvo krajnjih korisnika naših usluga – osiguranika i umirovljenika.

fzmiopio.ba

Iz Međunarodnog aerodroma Tuzla

Aviolinije za sedam novih destinacija

Iz Tuzle za Stuttgart od 15. aprila do 20. maja



Međunarodni aerodrom Tuzla od kraja marta proširuje mrežu letova, a 2026. godina mogla bi biti jedna od najuspješnijih u njegovoj historiji, sudeći prema najavama uprave i planovima aviokompanija. Prema projekcijama, kroz tuzlanski aerodrom tokom ove godine moglo bi proći oko 760.000 putnika, što bi predstavljalo rekordan broj u njegovom dosadašnjem radu. Ovakav rast rezultat je intenzivnije saradnje s avioprijevoznicima, prije svega s kompanijom Wizz Air, koja ponovo jača svoje prisustvo u Tuzli.


Krajem marta planirano je baziranje drugog aviona ove kompanije, čime će Tuzla dobiti čak šest novih destinacija i dodatno učvrstiti svoju poziciju na regionalnoj mapi zračnog saobraćaja. Već od 29. marta putnicima će biti dostupni letovi za Göteborg u Švedskoj i Bratislavu u Slovačkoj. Dan kasnije, 30. marta, planirano je uvođenje linije za Berlin, dok će od 31. marta u ponudi biti i letovi za Frankfurt-Hahn u Njemačkoj, Pariz u Francuskoj te Larnaku na Kipru. Posebnu pažnju privlači linija za Bratislavu, koja se nameće kao praktična alternativa za putnike koji su ranije koristili bečki aerodrom. S druge strane, Larnaka bi mogla biti posebno atraktivna tokom ljetne sezone, imajući u vidu popularnost Kipra kao turističke destinacije. Wizz Air uvodi privremenu direktnu avioliniju iz Tuzle za Stuttgart od 15. aprila do 20. maja 2026. godine, zamjenjujući liniju za Basel. Letovi su dostupni 5 puta sedmično. Uprava aerodroma očekuje da će proširenje mreže letova i veći broj raspoloživih destinacija dodatno povećati interes putnika, ali i ojačati ekonomsku aktivnost u regiji. Karte za nove linije već su dostupne putem zvanične web stranice Wizz Aira, kao i na šalteru za prodaju karata na Međunarodnom aerodromu Tuzla.

fokus.ba



Prema podacima za 2025. godinu, došlo je do pada obima industrijske proizvodnje u Tuzlanskom kantonu za 6% u odnosu na 2024. godinu. Proizvodnja intermedijarnih proizvoda i kapitalnih proizvoda ostvarile su rast obima proizvodnje i ot 1,8% i 1,9% , respektivno. Proizvodnja energije je imala pad obima proizvodnje od 17%, a trajni proizvodi za široku potrošnju i netrajni proizvodi za široku potrošnju pad od 9,6% i 5% , respektivno.

Industrijska proizvodnja	Index	%
Ugalj i lignit	97.6	-2.40
Ostale rude i kamen	111.3	11.3
Prehrambeni proizvodi	96.8	-3.2
Proizvodnja pića	96.2	-3.8
Proizvodnja tekstila	74.2	-25.8
Proizvodnja odjeće	77.7	-22.3
Koža i srodni proizvodi	92.7	-7.3
Preradba drveta osim namještaja	83.8	-16.2
Proizvodnja koks i derivata nafte	74.9	-25.1
Hemikalije i hemijski proizvodi	99.4	-0.6
Farmaceutski proizvodi	119.5	19.5
Proizvodi od gume i plastičnih masa	98.7	-1.3
Ostali nemetalni mineralni proizvodi	108.1	8.1
Proizvodnja baznih metala	83.5	-16.5
Metalni proizvodi osim mašina	107.8	7.8
Električna oprema	117.2	17.2
Mašine i uređaji	89.5	-10.5
Proizvodnja namještaja	90.4	-9.6
Proizvodnja i snabdijevanje el. energijom, plinom, parom i toplom vodom	81.8	-18.2



Industrijska proizvodnja I-XII 2025/ I-XII 2024 (%)

Ukupni izvoz iz Tuzlanskog kantona u 2025. godini iznosio je 2.120 miliona KM što je za 4% manje u odnosu na nominalnu vrijednost izvoza u 2024. godini. U istom periodu ostvaren je uvoz u vrijednosti od 2.627 miliona KM, što je pad nominalne vrijednosti uvoza od 6% u odnosu na prošlu godinu. Ostvaren je vanjskotrgovinski deficit od 506,5 miliona KM, a pokrivenost uvoza izvozom je 80,7%. Najveći izvoz je u mašinskoj i hemijskoj, a najvažniji vanjskotrgovinski partneri su Austrija i Njemačka.

I-XII 2025	Izvoz (000) KM	Uvoz (000) KM
Hrana i piće	71.743	282.780
Industrijski materijali	939.442	1.002.816
Goriva i maziva	30.706	147.375
Kapitalni proizvodi	379.931	489.302
Transportna sredstva i dijelovi	138.132	152.866
Proizvodi za široku potrošnju	374.237	322.482
Ostali proizvodi	186.467	229.545

Izvoz i uvoz prema BEC I-XII 2025.

U 2025. godini, prema podacima Porezne uprave FBiH, u Tuzlanskom kantonu je naplaćeno 1.502.171.275 KM javnih prihoda. To je 9,72% ili 133 miliona KM više u odnosu na 2024. godinu. Tuzlanski kanton je drugi u učešću u ukupnoj naplati u FBiH sa učešćem od 17,13%.

Na dan 31.12.2025. godine u Tuzlanskom kantonu je bilo 103.886 zaposlenih i 60.085 nezaposlenih osoba. Prosječna neto plata u Tuzlanskom kantonu u decembru 2025. je iznosila 1.497 KM što je ispod prosjeka Federacije BiH. U odnosu na kantonalni prosjek iz 2024. godine, neto plaća je veća za 20%.

Djelatnost	Tuzlanski kanton	
	Neto plaća (XII 25)	XII 25/ 2024 %
A Poljoprivreda, šumarstvo i ribolov	1.434,00	24,3
B Vađenje ruda i kamena	1.736,00	10,9
C Prerađivačka industrija	1.310,00	26,0
D Proizvodnja i snabdijevanje el.en., plinom	2.207,00	8,5
E Snabdijevanje vodom i uklanjanje otpadnih voda	1.490,00	23,0
F Građevinarstvo	1.225,00	30,7
G Trgovina na veliko i malo	1.247,00	29,5
H Prevoz, skladištenje i komunikacije	1.192,00	29,3
I Hotelijerstvo i ugostiteljstvo	1.113,00	32,8
J Informacije i komunikacije	2.153,00	2,6
K Finansijske djelatnosti	2.012,00	26,6
L Poslovanje nekretninama	1.258,00	21,0
M Stručne, naučne i tehničke djelatnosti	1.552,00	33,8
N Administrativne i pomoćne uslužne djelatnosti	1.272,00	24,1
O Javna uprava i odbrana	1.959,00	11,8
P Obrazovanje	1.314,00	14,2
Q Zdravstvena socijalna zaštita	2.039,00	10,4
R Umjetnost, zabava i rekreacija	1.420,00	25,0
S Ostale uslužne djelatnosti	1.491,00	14,2

STRUČNA SLUŽBA KOMORE



Pogodnosti za firme članice Komore...

Oglašavanje na tri LED displaya!!!

Kantonalna privredna komora Tuzla nudi mogućnost oglašavanja na **tri Led displaya**, na **najatraktivnijoj lokaciji u gradu**, Trg slobode bb Tuzla.



Specifikacija Led displaya:


- Dimenzije centralnog displaya 6 x 2,7m (emitovanje gotovog materijala u formatu 16:9)
- Dimenzije dva bočna displaya 3,84 x 2,88m (emitovanje gotovog materijala u formatu 4:3)
- Dužina trajanje reklamne poruke do 12 sekundi
- Broj emitovanja: dnevno između 300 i 400 emitovanja
- Emitovanja u vremenu od 7,00 do 2,00 sata (pauza u emitovanju od 5 sati tokom noći)

Popust za firme članice Komore:

- Popust od 50% za godišnji Ugovor !!!

Gratis za godišnji Ugovor:

- emitovanje na jednom mobilnom LED displayu, na svim sajamskim manifestacijama na kojima Komora predstavlja svoje članice
- postavljanje reklamnog banera u komorskom servisu „Vijesti iz privrede“
- objava partnera Komore u komorskim novinama „Komorski informator“



POSTANITE PARTNER KANTONALNE PRIVREDNE KOMORE TUZLA!!!

OGLASITE SE NA NAŠA TRI LED DISPLAYA!!!

ISKORISTITI IZUZETNO POVOLJNE GODIŠNJE I ŠESTOMJESEČNE PONUDE!!!

POSEBNE POGODNOSTI ZA FIRME ČLANICE KOMORE!!!

Kantonalna privredna komora Tuzla | tel: 035/369-550 | mail: komora@kpktz.ba

POSJETITE NAS! DOĐITE DA SE DOGOVORIMO!!!

Iznajmljivanje kancelarijskog prostora u Komori

Kantonalna privredna komora Tuzla objavljuje izdavanje kancelarijskog prostora. Riječ je o tri kancelarije površine po 14 metara kvadratnih, na drugom spratu zgrade Komore, Trg slobode bb. Više informacija u Komori ili na telefon sa broja: 035/369-550 ili putem maila komora@kpktz.ba.

**PROSTOR
ZA VAŠU
REKLAMU
LED
DISPLAY
KOMORE**

**VIŠE INFORMACIJA NA:
komora@kpktz.ba
ili
035 369 550**